

更

生

齋

集

我

朝二百年來東南壇坫莫盛於毘陵而尤以乾隆嘉慶之際爲最著小倉山房詩所謂常州星象聚文昌洪顧孫楊各擅場者想見名流輩興動人歆慕洪卽稚存先生顧孫楊則立方伯照西河蓉裳諸先生也蓀弱冠出游從諸先生後咸奉手有所受獨稚存先生先以待直內廷繼復遠戍塞外迨

賜環南歸始獲一識荊州自是歲必游浙輒相聚於湖山佳處猶憶戊辰四月梅雨決旬西湖漲溢白蘇隄半在水中時蓉裳先生方主詁經精舍講席令子伯夔隨侍適先生來游遂下榻於此蓀於大水中棹小舟赴蓉

裳先生之約喜遇先生作竟日譚讌吳江郭頻迦亦在
坐先生諳諳相訂次年同游諸暨之五洩山頻迦以無
濟勝之具辭詰朝各匆匆別去逾年先生遽歸道山五
洩之游竟不果庚午晤長君孟慈孝廉知遺稿尚多有
待剞劂孟慈服除後出宰楚中未幾病歿諸弟俱幼不
相聞問者二十餘載茲遇孟慈弟子齡孝廉於倪濂舫
糧儲坐中並詩文續集未刻本俱在焉糧儲自幼習聞
先生之言論服膺久而弗衰旣得是稿亟任棗行因相
與商榷讎勘佐成其事凡更生齋詩續集十卷文續集
二卷附卷施閣外編二卷刻始於己酉四月葺工於七
月惟先生謝世迄今四十年遺書久度間有蝕缺譌錯

當時手稿或不盡存無從以原本校對乃與子齡商定凡佚脫殘損之字胥闕疑待補不欲憑臆增改至先生之詩論者或以爲好奇不知先生詩於理則醇於法則正其用意造句不肯少涉凡近類於好奇乃少陵欲語羞雷同之意實非牛鬼蛇神詭誕不經之奇也蓀十一歲時見畢秋帆尚書所選吳會英才集卽喜讀先生詩及伯鼎先生之峭麗古豔蓉裳先生之纏綿跌宕皆朝夕諷誦不去口今復校桀是編獲觀著述之全可爲幸矣道光己酉秋七月海甯楊文蓀識

更生齋詩續集目錄

卷一

古今體詩二百五十三首

卷二

天台石梁集

古今體詩一百五十二首

卷三

匡廬九江集

古今體詩一百七十五首

卷四

徑山大滌集

古今體詩一百十七首

卷五

武彝九曲集

古今體詩二百十九首

卷六

古今體詩一百七十五首

卷七

古今體詩一百五十二首

卷八

古今體詩一百六十五首

卷九

古今體詩二百三十五首

卷十

古今體詩九十五首

更生齋詩續集卷一

陽湖洪亮吉著

甲子元日

六十看看欲到頭卅年爲世又重周慙無一事酬君父
祇有千篇記釣遊涉筆動推今少輩焚香靜與古爲儔
修文未召巫咸遠想尙容人少滯留

題亡友管侍御世銘讀雪山房卷子卽示令子學洛

春明門外攀車別君留尙讀燕山雪勸君過歸君亦允
未遂歸心遽歸骨故人歸骨纔一秋我復荷戈西海頭
生還贈詩盈一束只恨少君長句讀故人有子亦老蒼

南邊讀雪仍作堂山房讀雪南北殊腹痛忍過君新居
君不見平生相期汗青史我愧投荒君遽死丈夫事業
甯止此努力還期故人子

續城東酒徒行贈陸孝廉繼輅卽題其行卷後

孫郎憔悴黃郎天可惜城東酒徒少雙丁二陸夾里門

城東近復添酒人

謂解元煦明經履
恒及孝廉叔姪

酒人豈止豪于酒

前後詩名亦誰偶復有周郎絕妙詞

舉人
儀暉

欲兼秦七同

黃九卅餘年來壇坫存愧我筆弱非凌門黃公墟下一

回首怕見渡口升朝瞰青山莊圯陳園破約客欲從何

處過已少平生鬥酒場茫茫清淚杯中墮天荒地老仍

歸來杯底客盡埋蒿萊青松影裏石林立猶認玉山筵

上頽紫薇舍人前後死

謂莊選宸劉召揚兩舍人

落拓更憐狂刺史

眉刺史紳

蠻府參軍亦已亡

揚大令倫

城西自此無餘子

城東酒薄花亦稀僻處閒看飄酒旗酒徒零落不頻到壚畔剩有荒雞啼遂令百尺鶯花地無酒無詩壓奇氣玉局堂空硯水枯風廊月館都荒廢我憐住近東邊城却闢一齋名更生荷戈甫罷荷鋤始種菜自喜儕輩氓酒人舊者皆衰老所幸諸公後來好若說心期到古人周郎陸弟尤傾倒讀君詩完笑口開新月影外休裴徊一城梅花今始開與爾且覆三千杯

江陰過楊文定公里第

半生儒術慶遭逢節使清名擢秩宗六詔恩威開太傅

兩朝師友接宏農腹心重寄虛前席

時

純皇帝
仁公入相而公還

朝後不久旋卒

骨肉危言動九重誰識老臣憂國意屋頭猶挺

後彫松

祝秀才百五家食河豚作

千錢市鱖鮓百錢市薑桂言尋素心客聊作首春會是

時春江正上潮軟浪若席鱖鮓驕年殘春首况無雪厚

味腊毒人偏遭嘉慶九年歲甲子我食河豚危不死主

人行觴忽中止去品澄江一江水

是日河豚雞犬食之
有死者而客無恙也

登君山望靖江泰興諸縣作

江波寬處突一山水勢壁立山彎環潮平風靜三百里

極目不到金焦間焦山長老誰能待

時僧清恒
約遊焦山

我跨石

龍思過海卅年前客無一存只有馬馱沙未改樓頭關
牖看八荒落日正照滄溟黃雲生雲滅爾許忙來日飛
雨今宵涼

小塔巷訪李秀才

浮圖七級小古巷一條斜雁塔長安里牛醫叔度家樞
疎書格補粉暗畫屏遮

秀才工書畫

欲歛年前客剛來載酒

車

三河口贈李明經攀第

結屋欣從里社前水寬三尺枕書眠江分舟楫春申浦
學仿盤盂夏甲篇綠字赤文饒古簡紅螺紫蛤剩闕田
丈夫事業原難盡莫注蟲魚踵昔賢

雨中自東泐抵烏溪口

卷施高閣中霖雨已十日却買一葉舟遠從東泐出蜀
山中復斷林影半明滅鷗茲成陣起孤客轉淒絕夜半
湖口風衝波向船突

剪湖至夾浦

北風利如帚掃此天半雨崇朝變飛霰雲外白千縷遙
山成墨色缺處隱孤嶼萬頃盪朔風鴻飛已無序盧汀
停一半雙翅濕不舉衝岸帆影來啾啾感羈羽

長興贈姚茂才樟

肯被人呼作里儒三倉研後賦三都經洽杜預春秋癖

詩人

風聲偏雜雪一州山影總環湖

爽心亭畔談心處

是日陪遊城西爽心亭

多半花魂已欲蘇

長興懷古

萬頃湖波一葉通落帆剛值妒花風吳王沼有烹殘鱸

越國山留鑄後銅幢古尙傳唐大足殿荒不祀楚重瞳

卞山神卽項王今廟已圯

三長王氣都銷歇剩得靈濤響郭東

與邢大令澍話舊

判案方停靜掩關繁區偏覺一官閒夢縈鄧艾懸車道

大令家陰平

水接鴟夷放艇灣訪友我曾乘下澤著書君已

有名山素心海內應無幾早許煙波遞往還

二月二日過湖州城外

道場山外路一半社公祠五夜喧歌吹三堤颺雨絲病

嫌蕉葉滿寒覺杏花遲入夢先根觸猶疑負米時

丙申秋負

米經此垂三十年矣

荻港舟次

近構呂仙祠香火頗盛

卅里吳興道沉沉雲水鋪乍烹新翦韭猶有未芟蘆近
詡神仙宅爭趨里俗儒社公殊寂寞燈火塞他途
長興遊城西地藏殿并上爽心亭遠望

乍歇濛濛雨芒屨趁午晴水周三郡綠山放一痕青地
迴天風峭人稀士偶靈小桃仍未蕊危坐此孤亭

新市道中

一鎮千帆集波流四面通鄉看界吳越橋欲認西東半
殿祠風伯全湖蠶雨王陰晴仍未定夕采門青紅

將至黎里道出石門喜晤嵇大令承烈賦贈二首

五湖近作煙波長百里來尋水竹居失喜故人新宰縣
不妨退士暫停車虛名自愧羊公雀公論羣嗤華子魚
記否別來遊跡遠枕戈三月住穹廬

東華門內書千紙西子湖頭醉幾場絕域山川曾著錄

故園松菊久拋荒交情隔世勞重訂

余蒙 恩不死
自號更生故云

官况經年許飽嘗却羨宦程無百里桑麻影外卽家鄉
卷施閣卽事

菜花黃處入窗舒金石千通萬卷書做得小樓東面好
七層塔影上階除

飛觴準待百花朝玉蕊飄香紅杏嬌擬向北街招老友

趁晴曳杖過斜橋

十年記住層霄上萬里曾窮西海頭
九地九天都歷徧不妨此號謫仙樓

纔從小閣門溪茶却訝春陰暗
絳紗紅燭兩條人著史

時方編西夏國記 破除今日不看花

卅載東西卜宅忙此同居始傍官牆
三遷心跡勞賢母便合焚香禮北堂

誰說心情老易驕算年筋力勝垂髫
樓前奇石時時拜不向人間更折腰

青山莊圯亦園荒來雀蒹葭境渺茫
要向市廛尋隙地微泉閣外澹香堂

栽花纔了便疏渠深澗游鱗樂有餘我亦與渠堪合隊
九重天上放生魚

白石門放舟借稽大令承烈至海甯安瀾園久憩

一園已占州城半水復占園南北岸門前海色訝混茫
樓上雲光莽凌亂入門石砌高下分空腔老樹多嚇人
山禽尙咒昨宵雨水鴨自占回塘春竹聲初歇松聲起
蒼鼠導人行半里貪看奇石過溪坳不覺古梅橫澗底
樓臺半出倒景中面面總與波流通迎風千葉瑤草綠
零露一谷山茶紅鴉鵲兩兩春城上似怨杏花猶未放
照夢波光遞淺深合歡窗影頻惆悵一園百折勞幽尋
所喜客盡稱知心扁舟已挈向生笛此地合彈中散琴

半酣逃席人誰在一尺夕陽勞久待且容醉醒憩北窗
更理心情看東海

水仙祠

心香一瓣到應知入世襟期出世姿欲報早春花事好
靈潮先撼水仙祠

出海甯城東登塔院看潮

曲江濤頭天下奇此邑還居曲江上晨昏信早一二時
詭譎觀真萬千狀靈符昨到廣利王十萬水族推潮忙
甯惟日月色黯慘亦覺天地同回皇前驅已過尖山頂
塔上客來爭引領須臾濕霧城頭滿四面人家陷成井
齋心半日心已平不以目視以耳聽空中倏忽地輪轉

夢裡笑兀天山傾觀潮萬眾都緘口拜浪羣神亦低首
天帝分明呼吸通海山忽覺低昂久陰晴半刻驗未眞
天水一色光難分忙時仍閃赤白電高處欲逐青紅雲
前潮甫過後潮續至小濤頭亦千斛山樓一一驚沒脊
水府明明難駐足潮升潮落曾幾時白氣一綫中如馳
星芒幾點險欲落塔影七級危難支君不見丈夫懷抱
居然別俯仰隨人究何必不逐回潮東向奔世間惟有
西馳日

回舟泊長安鎮

海甯稱四鎮古諺賤長安

舊諺四鎮分富貴貧賤長安
鎮宋元時爲優人所集故里

俗皆賤之今習尙已改又荆襄米舟
抵者率皆聚此生聚較前百倍焉

近覺煙波窟偏欣

粟米寬越波輸萬頃

西湖水凡溉海甯等數州縣

楚艇集干竿今昔

居然異攤書枕上看

過嘉興城外感舊作

垂老驚心歲月遷扁舟重過此湖邊鶯花夢憶三春上

煙雨樓登卅載前客喜容金身首隕鳥憐屬玉羽毛鮮

鄭公清德居然異

謂鄭贊善虎文

一世從無郭外田

崑山訪亭林草堂及傳是樓故址

一百年前此縣中居然甥舅擅宗風甘陵植黨分南北
高密傳經析異同舉世共推黃髮叟全家吾重黑頭公
重來何止茅堂圯萬卷樓荒蔓草叢

吳門遊憶謝園書事

乍放辛夷未落梅，曲廊深館更徘徊。但今已息生前燄，
不怕重然死後灰。久宦總難填欲壑，多金聊復飾歌臺。
聖朝畢竟官方飭，戀棧何曾恕駑駘。

江陰憩廣福寺偶成

幾年重復到茲方，感事先登選佛場。不礙董龍能富貴，
果然孔雀擅文章。朱門客散今無影，黃歇山空夜有光。
我向廬江尋小吏，豈容干騎說同鄉。

再跋佩珊女史繡餘詩草

白髮詩人上玉京

謂許寶善侍御
吳蔚光祠部

詞壇今屬許飛瓊，豪

吟偏欲關身世，積軸翻嫌錮性情。大海魚龍呈幻景，滿
溪鷗鷺訂幽盟。自慙何福承拈線，不繡平原繡更生。

冬客

東生詩集卷一
承親繡荷囊
及詩筒見寄

朱家角訪王侍郎昶賦贈一首

朱家角口落帆遲五載重逢慰所思碩果近看餘一老

削瓜早見歷三司百千著錄偏能記

門下弟子最盛

八十研經

不廢詩却望西南洗兵馬快談不覺更憂時

贈施布衣希閩

七十才名施小愚靈濤仍向筆端驅此回眼界原應豁

一個詩人一巨區

崑山登文筆峯回憩花神廟作

蠟屐重來叩佛扃山光不夜已冥冥探奇絕頂雲全墨
語怪空堂燭半青久雨半城籠濕霧回風四壁走精靈

童年舊事仍能憶傳是樓繙漢石經

丁亥春初訪從叔縣尉至此曾借戚

徐某一登傳是樓

澱山湖舟中望九峯作

茲方稱水國江海皆在左靈明萬頃湖偏容九峯臥雲
紅垂十里白鷺飛一箇漁舟來對面正翦碧波破却趁
落月輝初更挂帆過

湖中值雨

湖龍只居湖不復入滄海龍居最多雨白晝雲鬣颯愁
霖已經月星日悉韜采舟行不到處赤鯉飛作隊意欲
喚網師漁人竟何在

舟行卽事

一樓四面窗面面臨曠野老蛟能變人時來嚇居者
漁舟女梳頭髮綠垂水面正欲避日光曉霞來一片
人傳赤鯉魚大半是龍子我欲烹鯉魚畏龍嗔復止
社公生日過香火仍不斷簷桃開一枝先與社公看
將抵上海先柬吳祭酒錫麒

小艇偏愁逆浪衝野雞墩外影濛濛欹牀短夢驚檐馬
出海濃雲裹雨龍濁酒縱斟難博醉遠書欲寄更開封
吳郎消息仍無定閒把燈花卜客蹤

客中憶崔三景侃病

却跨班騅憶陸郎記同情話向閒房多時舊夢堆花幌
幾日春心艷海棠石筍反肥林竹瘦山霞何暖水雲涼

調劑莫向庸醫問寫寄仙人海上方

題元人畫幅

新月天邊已挂弓池臺面面有春風紅襟翠袖都無恙
對住黃雲一抹中

更向門前築釣磯山風養得水雲肥深紅不艷深黃艷
菜甲花開蝶四飛

一春心事鎮懨牽自在山房自在眠不掩合歡窗兩扇
曉霞紅到枕函邊

忙裏偷閑尙讀書風來頁頁卷還舒居然一服清涼散
不啖荷珠卽露珠

避俗仍居雲水鄉下安琴榻上雕梁雙棲燕子孤眠客

一室權分上下牀

絕壁居然刷小橋
半春橋外影迢迢
一層夜色一層月
更有一層花露嬌

日午隨人上露臺
雨邊鏡影自徘徊
春衫花氣薰偏重
却惹遊蜂入袖來

飲澗投林任所遭
無端生趣逼枝梢
朝三暮四狙公粟
春半秋千燕子巢

小築居然占小洲
綠楊門外碧波浮
防他艇子衝波去
不畫春江在樹頭

難平一尺愁中浪
易買三峯畫裏山
看罷海天斜日落
樓頭半月已彎彎

江行卽事

戲完蘋渚戲蘭橈一隊銀鱗不過橋
要與海魚風味別去潮不逐逐來潮

留館也是園作

三度來遊候不同者番剛值軟東風
龍拖急雨歸天外燕掣新愁餉閣中
老去已慙花似錦醉來各吐氣如虹
改生畫筆林生句頓覺園林氣象崇

讀李觀察廷敬六十自壽詩率呈二首

不及歌筵逐眾賓遲來剛近百花辰
平安可憶狂書記

余未第時曾客君署脫略忘稱舊部民
天上大撓推甲子人間小

歲守庚申君以小除日初度松枝隱背松花食
早與長源作替

人

居鄰北海官東海守歷三州轄二州

君自常州守歷移江甯蘇州兩首郡

擢兵備松太

自壽百升新釀酒家傳萬石古諸侯

君昆仲皆官監司郡

守刺

寒梅正有霜中信仙侶都來天上頭

謂祭酒吳絳錫麒等

蠟四圍紅袖兩使君觴政本風流

上海城隍廟

欹斜半里中奇石散如馬空羣縱未盡駑下蓋已冥馬
驚人立石亦同作勢欲落波濤中君不見人間頑石尙
點首莫逐回湖向東走

春分日李兵備廷敬招同南園雅集聽俞生彈琵琶作
東邊西邊發杏花推手却手彈琵琶琵琶聲繁杏花放

一朶驚開酒筵上
琵琶聲稍略
琵琶聲多腕底欲養三春和
淩淩歷歷珠跳波
蕭蕭瑟瑟風捲荷
琵琶聲漸緩
琵琶聲促
驚落一聲天上
雪山禽一步復一啄
啄得空階響如爆
琵琶形製亦絕倫
多年蝨已成
車輪麻姑仙爪借彈過
面上略餘纖指痕
客家圓柳尖山口
豈特嗜音兼嗜酒
收得新聲月已飛
杏花枝外仍垂手

贈楚僧鐵舟

十年前事最難忘
雲水閒僧值武昌
避俗不妨居北郭
悟禪偏欲繪西廂
何嘗成佛輪靈運
未肯持齋學太常
醉向石闌揮數幅
張顛書畫本來狂

重抵吾園贈主人

東坡全集卷之二
三
遙天纔覺掃陰氛，入望林嵐總不分。
大海瀾回飛紫電，小樓簾捲落紅雲。
花驚自逐黃蜂隊，雀瘦猶欺白鷺羣。
殘臘訂交今隔歲，不妨留我坐斜曛。

十一日偕同人雨中集吾園，改山人琦復攜影蘭女史
見過，率呈二絕。

紅闌千外雨瀟瀟，趁雨還過獨木橋。
不住鶉鴝花底喚，似言明日百花朝。

豈止閒房集素心，尙同野鶴步苔岑。
美人怪底能行雨，惹得春泥尺一深。

花朝日偕同人至閘口訪瞿舍人秉虔賦贈

門前新築釣魚磯，却趁蒲帆欸水扉。
一院雨聲紅燭瘦。

滿溪雲影綠波肥花當生日開仍斂客號齊年會轉稀
笑我短衣西戍日此君先已遂初衣

舍人庚子副貢

花朝日鷗波池館卽事

半春何事尋春忙遠挈舊侶來茲方緇衣綠衫間朱履
更有紅袖相扶將鷗波池館波流繞一路語聲吹不了
製旛親自護桃杏築塢先看住魚鳥大風吹海海紫瀾
海勢欲捲門前灘樓頭仙客正高詠天外惡浪堆如山
三更尙欲留清話惡浪乍平帆可挂鐵舟開土明日來

好補閒人入圖畫

時方繪花朝雅集圖

吳淞江夜泊

三更風生棧一港月沉采開門欲逐呼婦鳩海色斜飛

半簾水吳淞江接黃浦江舟子一路歌吳腔春林陰陰
勒帆住頭上杏花開半樹

十八日招同人至艤舟亭小集

條風纔染綠楊枝木筆爭開洗硯池半畝水光梁燕繞
一春心事杏花知南樓雨暗更初急東海雲濃月上遲
明日挂帆江口去草薰波暖惹相思

舟行宣城道中

挂帆早發南湖口歷盡千村水楊柳村村楊柳村村風
雞犬靜默知年豐午餘偶泊江干埭高閣偏同花樓對
紅窗幾日費剪裁袖底一樹桃花開

晚泊水陽鎮

夢中聽雨醒復晴柳外蟬煉花間星黃鸝百舌相對語
寒食天氣須冥冥踏青女伴嬌裝束鬢不堆紅欲堆綠
濛濛柳葉簪髻旁別插數朶蔬花黃

寒食青弋江舟次

前年雨寒食轉得晴清明去年寒食霽上已反不晴幽
蘭露點茶辛夷花製餅只有故鄉人能諳故鄉景蜀岡
岡頭訪名花大鄣山北採嫩茶閒情別有鶯燕識江南
江北殊春華今年逸興遊難止看海初完涉江始雨餘
殘月鬥幽黃夢後野花成艷紫一舟稜稜拓四窗曉帳
尙復挑銀缸帆張百尺槳打雙聊記寒食來春江

二十三日山館看桃花

千聲碧玉簫九曲紅欄橋主人家居溪水均約客日晚
看山桃妖紅幾樹山窗下薄命東風事游冶除却瑤池
與武陵小桃可有長年者爲花歎息花已知花亦顧影
矜多姿君不見花愁飄零月愁缺短命桃花下弦月
清明日宿甯國學署早起

敬亭山雲飄入房遠近折柳聲何忙推窗花色復迷目
紅紫下襯蔬花黃沿階驚筍時時坼砌下草生何鬱勃
尋春甯止鶯燕忙破曉巢禽亦先出山光一層雲一層
缺月未落朝曦升尙嫌花氣未全暖高處復倩紅霞蒸
看花人老猶能健可惜好花都背面凌晨欲出戶尙扇
一畝紫苔先踏履

是日同人登北樓

一樓三面菜花黃杏蕊飄紅柏葉蒼二月雨多遲遠望
六朝山古易斜陽朱方我尚思丁夏絳縣人誰識亥唐

時喜晤戴文學某

自笑客懷同海燕每逢春半便辭鄉

廿六日琴溪雨中值同年魯太守銓

獨跨一驢盤石磴忽逢五馬返江城使君兩立官途左
待我詩從驢背成

琴筍琴茶貯滿盤仙人爲備客中餐翻憐赤鯉魚先去
不及橋西訪釣竿

檢得屠刺史紳所寄詩追輓一首

故紙重緝百感興卅年前事杳難憑閑情究累韓光政

醇酒先亡魏信陵會記竺中重九讌未忘燕市上元燈

詩人循吏談何易一著終當讓義仍

君生平慕湯義仍爲人然作吏傷于

酌以此不及

偶成

猿臂北平善射貝齒東方讀書名將更推不識侍臣誰
及相如

龍頭龍腹龍尾三客分成一龍固知才有大小合作南
陽葛公

延芳書屋看牡丹有懷張太守鳳枝

延芳書屋此重遊積雨初晴露未收小苑風光偏綺麗
大方顏色不嬌羞十分春向枝頭膩
瓣香從幕外浮

誰識靜中開落意有人腸斷綠珠樓

書更生齋壁

半生遊名山垂老戀鄉曲遭逢有通塞懷抱本殊俗好
花方悅志飛鳥已過目三萬六千日嘗苦遊不足何止
惜分陰仍須秉明燭

更生齋銘

一禱之味精于五侯容膝之室寬于九州居下易樂居
高易憂尻輿神馬於茲少休

度箬嶺

雷聲西北厓客行剛對面春衣不沾濕時落雲一片黑
霧欲迷人欣飛谷中電

萬福菴避雨

茶菴當孔道暫此避炎蒸
風引劈空雨雷驚入定僧
水泉飛百道竹屋響三層
何事經帷內仍懸隔宿燈
將抵吳公壁急雨

孤峯無十仞雨乃積百斛
手劈上嶺雲思從下方宿
暝色又已來依巖候雙燭

長春山館夜宿

四山深黑處中有一峯晴
瞥見茅菴突孤懸落月明
水聲穿樹窄石勢壓樓平
祇覺高寒好看雲滅復生

吳公壁阻雨二日

萬聲隔戶總不聞

時戶外寓客叢雜
徹夜有歌吹聲

滿耳祇覺飛濤奔

飛濤三日響不絕風急入夜仍敲門昨來笑我南行駛
誰信春衣薄如紙林禽亦復不耐寒穿屋東西噪難止
風聲水聲排一關行客却步難躋攀須與松勢盡東靡
一水倒流仍上山閒房客到誰復省嶺遍檐低如坐井
君不見四山無雲日韜景各有飛泉冒山頂

二十五日行至許村稍霽

山山春雨晴嵐翠淨如洗懸流驚斷渡迂道行數里山
果欲熟時深林鳥聲喜

豐口從竹簞渡

十竹貫一繩載客乃六七高低懸十旬直下祇一瞥飛
瀑崖上來篙師頂先沒

行抵巖鎮方博士如川館我于鷗光精舍卽席賦贈一

首

閒中相訂已經年館我豐溪潁水邊鷗鷺有光飛徹夜
松杉倒影入層田典林近欲裒千則釋菜今看補一篇
他日曲臺如問禮巷名何愧叔孫先

所居名先生巷

抵洪源舊居贈從兄嘉鳴

莫笑頭銜已盡刪尙欣生入玉門關身隨豎亥東西步
家剩淮南大小山骨相總同前度瘦心期誰似此翁閒
天都采藥如同往

兄醫道最精

定挈黃芝白朮還

與族子仁夜話

卅載重逢有鬢絲離觴入夜酒難辭杜陵已覺從孫少

時從孫太守撲中翰榜均已下世

王濟猶嫌臣叔癡笑我半生甯暖席

感君三復致危辭琅玕補種非無意他日還來拂故枝

洪源謁宗祠

連峯中斷處剛見月華東

祠前卽月華一名司空山以八世從祖恭靖公長工部時

得

名開寶風原古

自唐開寶時始祖諫議公爲宣歙觀察使始家于此

忠宣派尙同

鄱陽支亦從此遷

水源分大壑山勢表司空只惜書聲少還愁

減素風

雄村上先冢

雨霽飛濤浦雲迷秀麥天我尋先世壠人指大同阡骨

肉分三地松杉合百年一篇循吏傳誰可繼前賢

峯山渡并登小南海久憩

岑山渡口夕陽流兩岸人家總若浮澗水忽然高十丈
三層樓上入扁舟

中流一嶼水濼洄驚鯉斜飛浪百堆七十二鱗皆紫色

十年蕭寺聽經來

潁水濁歌

豐潁二水皆出黃山而清濁各別至巖鎮東乃合流戲作此歌

淮水濁潁水清淮頭潁尾怡我情豐水清潁水濁一澗
雙流娛客目潁水清可濯纓潁水濁祇濯足却比滄浪
多幾曲君不見一峯昨向黃山傾昨因積雨黃山一峯忽圮壓斃數十家用
及之驚流百丈不得平潁水愈濁豐難清

夜宿古寺讀山海經作

閱徧山經復海經總愁伯益未能名幻來色相都無著

見慣靈奇亦不驚
螭魅歲多偏解語
髑髏宵半卽飛行
先生欲續夷堅志
好趁神龕燭半明

捕蟬行

一蟬響一枝十蟬響十柯
開開四面窗蟬響何其多
餘聲尙未到別樹黃雀笑
來將汝捕微蟲雖小響未沉
尙向黃雀喉中尋

賣兒行

賣兒女供耶孃人價低穀價昂
耶孃飯未足幾處拋骨肉

土豪行

爲土豪傳兩代忽值歉年糧價貴
糧價貴競攘糧攘糧

共向豪家藏君不見豪不攘糧糧滿屋攘者出門豪入
獄爲世指名先就戮得禍亦奇冤亦酷

讀吳次尾見山樓集

舊居何處見山樓客到荒村馬亦愁防亂檄驚吳次尾
讀書功過賈長頭獄成西市多僨伍黨錮東京作輩流
太息青溪兩生廟藻蘋同薦竟無由

卽景

荷花世界水生香隻影先看下北塘畢竟艷情忘未得
白鷗都欲覷死央

程園紅豆樹歌

在巖鎮

何年爲植相思樹挺榦入雲雲亦妬海南春色到江南

挈得羅浮蝶無數花瓣白花心黃過嶺尙帶雲霞香君
不見花間仙蝶時兩兩只少蠻中鷓鴣響

將別洋川書院留示諸及門

三度洋川感歲華問奇差喜得侯芭詩懷半敗催租吏
經學全輸賣餅家夢到者番山徑熟波回之字水程斜
心情幾日難爲別且進門前載酒車

四月十五夜起坐山樓看月

人家多住白雲鄉燈影齊收露影涼念念此時都已宋
空明水與月爭光

自琴溪歸里頻日趙兵備翼方大令寶昌聯舫約觀競
渡率賦一首卽和兵備原韻

琴高溪前雨糝糊銀林霸頭啼鶉鳩客行時復問來艇
競渡消息傳聞殊蠡河橋畔忽狂笑龍尾已揭龍身趨
初三國忌初四雨初五淡日泥金塗遂令畫舫塞河滿
幔曳五采簾垂珠官河見舫不見水萬艇直接三橋鋪
三龍出水各遊戲東龍青色西龍烏層層幟鬣遍天半
一織竟比高浮圖誰憐霖潦及五月三田之麥半已枯
朝來入市糴斗米案上三百攤青蚨民之蚩蚩竟何意
飯可不飽船先租白雲溪接北關口夜半月出猶歌呼
水嬉六日費十萬五坊質庫錢已無諸公半有牧民責
俗奢示儉當何如我今責備所不到霑體久已成農夫
雖然瓶罄亦須恥遣悶聊爾傾百壺君不見三斗五斗

酒可沽千聲萬聲雨脚粗雨龍天外忽飛挂水中龍畏
真龍乎

蔣二廷曜幽居圖

十年爲吏走風塵夢醒仍餘自在身溪上夜烏應歎息
紅顏都作白頭人

薺菜挑殘三月三閩中病婦亦攜籃山亭無日無人到
煮茗時爲世外談

苦雨

一椽前後枕幽溪三日林鳩不住啼纔展八窗看曉色
雨聲南北電東西

水明樓外水周天樓上依微入爨烟霽雨滿街人不到

一雙鸚鵡對牀眠

十七日雨同人欲至槎舟亭不果回集天井坊至二鼓始散卽席贈楊太守燁

偶乘佳節返江鄉畫舸欣聯水一方芳草馬雞盃共飲
美人換馬曲難忘纏頭不惜唐江夏強項偏追漢洛陽
誰道使君心似鐵呢他紅袖捧離觴

寓齋望雨

日日莓苔滅綠痕小樓望雨自晨昏西南風急移龍陣
不向江干向海門

五月廿九日欲至能仁寺訪趙舍人良齋迷道不得達
回途已大雨矣却寄一首

風聲初密雨聲疎三里來尋靜者居松翠到門零欲盡
電光入壁走偏徐然蒸正憶劉中壘飛瀑先驚李左車
一尺水深歸未得欲從山店買疲驢

初四日急雨同人憩莫愁湖值鉛山蔣孝廉知節卽席
賦此

雨花岡外風千縷散作莫愁湖上雨湖頭乍覺收飛電
咫尺蔣山新月見陰晴涼燠倏變遷入座行客先添綿
闌干十二回風急湖浪居然半空立酒酣思膾赤鯉魚
却有魚艇風中趨雨師風伯怒不止謂我私烹赤龍子
憑軒幸我酒陣堅風雨轉戰仍難前酒杯初放茶杯接
三十六峯雲霧壘隱仙菴遠不可尋欲喚道士彈鳴琴

是日欲至隱仙菴訪道
士王清真以雨不果行
鳴琴無聲雨聲代急響
迸從波

上碎文禽花鳴隊已分
一林昏鴉復逐人僧雛
一半野如鹿僕從懶散
如羊羣棋收一局詩千
句難得三江酒人聚三
江詞客別十年意外忽
與同酣眠酒人思歸天
亦黑小市燭龍多似織
君不見出門百步望始
愁急浪正擺三層樓

笑友人問近狀

得歸纔得卸藥韉桃李
迎門恍欲言從此却添
閒富貴蛙真給廩鶴乘
軒

口占題莫愁湖

神仙富貴分頭占一箇
茅山一蔣山只有斯湖
尙公道

英雄兒女總相關

夜半發燕子磯

燕子磯頭三百舟夜深齊欲趁東流懸厓閣上西風起
盡挂征帆出蔡州

偶成

海外仍傳箭天南未洗兵祇期中歲壽準望泰階平昔
夢烏頭白新歌魚尾頰如聞叔孫媯祈死有餘情

中秋日李兵備廷敬邀同吳祭酒錫麒祝編修堃趙司
馬懷玉林上舍鎬儲上舍桂榮改山人琦暨鐵舟上
人吳淞江泛月至三鼓始返

船頭背北風船尾向東郭船頭明月隨潮生船尾歌聲

趁潮落吳淞江頭尺五潮明月影與波光搖一輪端正
出東海已有百萬魚龍朝鷓鴣鵝鵝隨波沒復有驚鱗
浪中突却舉空中酌月杯柁樓先餞西馳日天光收入
江海光天末一綫餘斜陽二更風定月逾皎霞采月采
搏深黃萬聲出郭何稠疊一笛迎風戾聲響惹得吳淞
百斛舟四圍波面鋪如葉吳淞江接黃浦江拓徧十二
玻璃窗酒兵險欲與潮鬥拇陣未肯隨波降狂來別逞
談天口亂吸山陰百壺酒左欲持螯右拍肩傳杯合倩
旁人手欲落未落灣頭青欲歸未歸更鼓明諸公果爾
發高興喝月且使空中停陽侯亦解飲詞伯擘浪分風
送歸客君不見歸客秋窗自在眠月華正向樓頭直

十六日瞿舍人秉虔邀同人集鷗波池館夜久卽留宿
齋頭率賦一首

依然半間舫仍挂昨宵月孤客醉未醒潮生復潮滅山
雞啄粟味最腴堆盤復進海大魚座中林生樂有餘說
鬼已了仍軒渠虛窗容散無餘事插架奇書自鱗次半
晌齋南學坐忘一廬秋水人間世

十七日吾園小集聽鞠叟及俞生對彈琵琶

吾園水屋敞三邊客倦時時許醉眠絕似萬松塘外路
一雙飛瀑落檐前

天寶開元法曲高雲雷平地起檀槽夜郎詞客飄零久
淚點從前宮錦袍

十八日黃浦江上喜晤鄭侍御激率贈一首

看潮偶集浦江東廿載神交半刺通久客想因吳地鱸
遠人知避鮑家驄猶憐到海身如寄誰識回天術最工
今日 聖人求治切願公莫更作冥鴻

春江花月詞爲田汝苻作

郎持篙妹持楫人與花皆並頭立天邊月一鉤江上舟
一葉春江候潮郎候妾百花生日開花筵誓心歸郎郎
亦憐坐上客與傳紅箋花生日到潮生日花謝水流人
已別嗚咽秋江半江月春江潮秋江潮潮有信人無聊
禱潮神神乃喜欲迂徑寸珠須憑一雙鯉春潮反急秋
潮緩莫謂相思天不管月與珠光同日滿南去謝鯉魚

北去謝蹇修趁此花月夜更會春江頭君不見大潮生
日纔通信更待百花生日近花下與郎時問訊

題雲間女史張嬾畫冊

小閣三層淑景賒寫成荷葉倚風斜詞壇合喚張居士
畫是名家品大家

十九日避酒出南園林上舍鎬復招同故山人琦湯布
衣成暨令子詡至春風樓痛飲三鼓乃返

酒人逃席思出遊

是日大令蘇昌阿招飲未赴

半道客復相遮留醒

談畢竟不能樂一笑更上春風樓玉壺山人改七薌舊
侶遠挈南園湯故人有子如我長樽前喚出爲奉觴半
樓斜陽半樓黑一市人看座中客非絲非竹非鳴鉦頗

訝歌聲出金石

是日各誦
自所製詩

此行十日醉百回覆袖何止

三千杯秋花如拳亦怒開花色却映黃金罍酒人相持

一何苦江上濤聲已如虎臨波故擾鴻鵠眠上嶺復爲

鷓鴣舞三更不歸入四更籠燭道上無人行君不見酒

人中酒亦易醒臥聽絃管喧平明

縣署譙客
徹曙甫散

元人白描揭鉢圖爲李同年廷敬賦

我疑九子母亦是果羸蟲化生一萬兒其么最稱雄人

生不怨乃如此飽啖人兒愛親子一齒牙中嵌一兒啼

聲十萬喉中死居然彼教生慈悲飛鉢乃壓魔王孩拋

天鬼勢揭不得鉢上似鎮山蓬萊世間蠻觸何能算笑

看魔王法王戰鬼兵噴霧高若雲一座須彌色昏暗蓮

花臺上升朝陽鬼頂盡復燎神光鬼兵卸甲鬼母哭一
步一拜馴強梁君不見降魔不獨西方教我亦有方除
鬼道俟彼毒口開施我障眼術所啖一萬兒均係魔腹
出魔兒食盡母始知卽借魔母除魔兒魔種旣絕人種
滋不然亦使魔兒一萬化作獍與梟養成羽翼返舊巢
鴟鴞食母獍食父鬼母寥寥哭聲苦

出郭見秋成有望喜賦

半秋憂水潦忽爾報豐穰我喜同鴻雁仍能飽稻梁未
知來日促祇覺去年長笑指黃花句能容醉幾場

九月三日偕朱比部文翰昆仲放舟至唐文襄讀書臺
兼訪李秀才述來卽席作是日值余初度日

五里迢迢此問津讀書臺訪許東鄰偶浮篋舫同飛鷁
閑看萍花漾隱鱗山叟暮年忘甲子水仙初度憶庚寅
兒童拍手緣何事笑指風前墊角巾

廿三日雨中天甯寺僧了月約至淨室浴歸赴友人持
螯看菊之約

雨中約我清池浴九月溫湯泛寒菊浮波更有艾葉香
道士遠寄仙人方齋心危坐歷日午四面雨聲喧若鼓
僧厨不足饜老饕歸漉新酒持霜螯

何所行樂十六章

甲子冬孟將遊狼山道出邗溝友人方孝廉本儲明
經潤書韋進士佩金宋博士葆淳等日偕出遊皆三

十年前老友也臨別爰作何所行樂十六章以貽之
何所行樂邗溝北門堆徑黃葉生埋酒人餘子尙醉壚
頭凍春容欲作歌餘聲忽吞

何所行樂平岡西頭病燕不歸仍巢小樓澗水十折時
而不流一板作橋狐狸出遊

何所行樂荒翳蘭若酒人思肴攀樹及鵲喬柯徑登半
苦脚弱閒調僧雛亦足嗚噓

何所行樂舟行水瀕銀刀漾雪膾此錦鱗紅橘滿樹食
之生津踞地不起言拔土茵

何所行樂城東竹林澗別卅載寥寥素心鬼有新故人
無古今促膝醉眠軒聲鳴琴

何所行樂踏波深渚谿喧獺飛忽已上樹千尋藤蔓挽
客欲住燐燈嚇人集袂無數

何所行樂人皆不知閒披墳蘿搜尋古祠一樓傾欹柱
半不支鼓勇直上危扶柏枝

何所行樂迎神下元神輿參天儼從古冠靈旛颯颯風
露亦酸時有影響出乎深淵

何所行樂曲房琳瑯赤日未暗于鐙轉廊楚女膝席時
呈一觴短歌非短長夜不長

何所行樂行酤市橋不速之客來如猿獠箏琵琶絃索間
以玉簫無須利市時詠大招

何所行樂快登浮圖茫茫四圍淮江海湖山沒洲島參

差楚吳望中金山小如玉壺

何所行樂狂升蜀岡生駒放青倒牽石羊斷碑稜稜劈
作界墻林鴟笑人胡不舉觴

何所行樂董相舊廨千齡瓣香十日庶下更生橋居廣
川學舍前無古人後渺來者

何所行樂曹家選樓同時寓公邈焉寡儔

謂黃仲則暨
余伯扶昆仲

金曉芳明經
今並下世

停雲八表歸骨九幽我思其人憑軒涕流

何所行樂披尋古書閒攤冷巷疊壓十厨鉤金卷石披
及五銖里姥怪問疑爲賈胡

何所行樂狂書百綾頗恥繆篆惟宗召陵老友末疾

謂錢

同年站得風疾後以左手
作篆尚工今賣字爲活

運以左肱雖嘲插標實欽引

繩

抵維陽寓董公祠十日

得歸仍擁舊頭顱又向邗溝訪釣徒有愧更生劉子政

無妨重拜董江都百年能作幾回客

三十年前曾寓此敗壁尚有舊題

六日喜看三泛湖笑我不窮仍不達留題曾罩碧紗無

自平山堂募歸諸生復約過梅花書院感賦一篇

草元亭側樹婆娑又感諸生載酒過第一巍科須手搏
九千奇字罷胸羅翁思久作刑餘叟劉秩誰呼曳落河
多謝故人勤慰藉更番新調當離歌

道中阻風前後三日

急浪衝舟三日停寒蘆葉葉起荒汀阻風中酒偏堪慰

寫滿牀頭廿卷經

時自寫左傳
詁定本適竣

同人詣上方寺看黃葉

月出上方寺冷照宮門斜
炊煙簇高橋寥寥幾人家
林葉未盡黃斜著萬點鴉
繚垣從東頽半藉松竹遮
屈指秋已殘古冢尙作花
莓苔何青青蝕此窗上紗
寒序氣轉溫仍響澗底蛙
閑僧伴勞蹤坐久乃喚茶
同儕欲遣歸分走路數
義我亦挂席行前塗
指星沙

登高旻寺浮圖望海先柬韋同年佩金

綏遠城頭薜荔丹
兩人同捧救書還
誰憐謫宦皆重跡

偶博衰親一啟顏

君尙有太夫人在堂

夢裏烏孫疑鬼國
望中黑

子是神山閒從東海尋
西海心怯瓜沙萬仞關

泰州岳家山謁忠武寺忠武曾爲通秦鎮撫使駐兵于此

少保當年此著勳，斷垣兀自起風雲。
年豐四野雞豚社，水滿三田鵝鵲羣。
井邑久迷張氏壘，土人仍說岳家軍。
心香一瓣無多祝，伫望東南淨海氛。

汪上舍文錦才而善病書此以勗之

李華有精思，乃賦古戰場。李賀有奇句，乃貯古錦囊。
君才如二李，齒亦適與方。惟愁欲嘔心，涸此錦繡腸。
願君師顏回，終日並坐忘。屏絕聽與明，靜卽療病方。
君家令弟，才是亦雛鳳。皇樂此壤與，篋升歌間笙簧。
我才慙子雲，何能賦長楊。他時草元亭，時或具一觴。
股勤何所酬，惟當贈凡將。

贈岳家山僧鏡臺

少保崇祠外支公此結茅削堤危石齒圓牖礙林梢地
逼萑苻澤僧時遭劫居同燕雀巢幾時忘世事門外挂蠨蛸

豐利場訪汪兵備爲霖卽日留飲北園作

二水環衣帶居然綠淨園地寬雲作陣天濶海爲垣紅
燭轟朋飲青楊隔市喧與酣歸去晚斜月滿平原

廿一日復招飲韻石山房

三日帆停雲水鄉快談纔了便飛觴海中鷗鷺依人久
天上星辰瞰客忙白髮繞觀新酒翰素心驚問舊彈章
時客問已未年事迎門殘月攔門酒不覺先生興益狂

侵曉泊通州南門喜歐陽所同年見訪

一醉經旬日酣眠髮未梳故人來白下得句比黃初兩
舫燭光合三橋雁影疎朝飢正難忍同此食冬蔬

自通州南門車行至狼山道中作

偶駕人車出古城飛沙十里走灘聲地因逼海峯逾削
天許看山日乍晴激浪魚龍偏有勢浴岡草木尙疑兵
時平故壘芟除盡坐看閒雲滅復生

登狼山絕頂浮圖

直上疑追鸛鶴羣天風響處掃餘氛連山四面圭稜峻
一壘三州界畫分

隔江卽蘇常諸山

江海勢寬容隻影東南地

缺補浮雲茫茫百感填曾次且借壚頭薄酒醺

歸途憩雲深處禪院

一山行已盡黃葉四無邊雲亂欲成海石竒爭補天
泉斜礙足古佛正隨肩知我芒屨倦先邀竹屋眠

訪唐駱義烏墓

偶訪先生墓閑披老衲關古碑今未泐疑冢信難刪
地近田橫島雲連黃歇山丈夫輕一死風義凜塵寰

狼山卽事四十韻

此山當東南一氣走江海桑田今漸漲海勢亦全改
連山首首仰獨此頰而迨千秋黃翠赤一一攢碑礪先登
甯反顧直上級磊磊山腰面平陸擇地憩爽塏隨雲升
絕磴樹古悉疑鬼甯惟僧似獼古佛亦傀儼團蕉亦南
北倦或一升巖鴻濛瀕洞日到此幾年載白狼居天門

昔有白狼居

此山故名

頗復肆譎詭多生遭啖嚙視若蛇與虺不

知經幾劫窟穴始無在陽侯助喧豗白日亦匿采荒荒

匹圍浸今始削成壘螺田蛤田漲龍氣蜃氣餒橫遭干

頃奪海若究奚舉互疑東溟神攫取巨靈賄遂移斷鼇

足戴此石層累驅濤罷文種遠迹勞豎亥強梁甯得忍

奪此乃與彼居人判今昔誰得悉原委百千溝澮洳水

急潮尙滙冀尋主者問主者色殫歿游移無定說否否

復唯唯茲來風日好喜值月之亥冬容縱淒瑟春氣仍

蕩駘年豐羣盜息雨洗衆山靉南閩及西蜀各路悉奏

凱偏灾勤撫卹百族歌圍閩名區真咫尺不到空後悔

仍欣腰腳健扶謝一枝楊遊山先治具羅列及菹醢誰

貽洞庭橘兼致泖湖蟹闌干坐經午時復露檣桅虞山
黃歇山數點青蒨蕾海門當面出雪浪岡晶曜來源看
萬里直下竟難待思窮秦漢蹟石碣斷按採徑上塔五
層茫茫問真宰

戈裕良布衣醉後失足敗面詩以慰之

我愛戈東郭平生志行醅醉傾千日釀飲共八仙人時坐
人 邱壑曾中久圭稜面上新何因遇頑石反自點頭

頻

連日汪觀察邀作狼山雉臯之遊臨別賦此志謝

東來客與詎闌珊一日川程靜掩關時值家忌別舫尙

攜三勝侶謂同年歐陽炳願秀才孫鼎燾上舍故人今贈五名山通州城南凡五

山簪裾謝後遊方壯

時觀察亦乞養家居

岳瀆行完鬢乍班何止

素心勤倒屣最難天亦與清閒

訪水繪園故址

冒氏名園好亭臺劫火收祇應餘逝水猶足悟來遊寺

有談空處

園半今作雨香巷

池虛繪影樓此行須秉燭方不負

句留

水繪園旁有別墅池館者率賦二首

絃管聲中烏鵲愁百年無復舊風流近來喜共屠沽飲

莫上君家水繪樓

秋樹巷中葉已凋浴堤惟剩草蕭蕭辟疆園裏游鱗好

不過紅闌六曲橋

通州觀海回將詣焦山道出三江營訪湯守備貽汾不
值與令弟貽浚夜話卽柬一首

觀海歸來欲住山半程先此歛巖關支離客到心偏喜
競病詩成手自刪半壁雲煙山徑削一江鷺鶴水師嫻
心期十載交三世擬挂征帆遞往還

自三江營放舟至焦山

江南霜乍落江北葉爭飄風緊劈波駛天空入望遙耳
傾前後瀑心未去來潮及到雙峯口圖山手可招
風水不便夜半始抵焦山

亂帆隨意去一綫水光微到岸鼓三下浴堤葉四飛夜
潮寒到枕山翠濕沾衣歎戶無人應應知宿火稀

東坡詩集卷一
三

顧文學鶴慶繪山水圖寄棲霞僧慧超屬題其首時慧
超年甫六十又病甚

兩歲不通問訊書嬾殘之嬾當何如昨來偶得江臯咏
因嬾無何復成病君家跛雀真同心君病鶴亦同呻吟
鶴病在足君病在腹鶴病煩俯仰君病勞起伏故人愛
君仍祝君手寫一朵峯生雲古樹怪石雲氤氳海中三
神山寰內五名嶽君遊未臻一胡乃病遽作一峯拔地
無彎環此嶺絕似黔中山君能黃金鑄頽頽尙可與我
同躋攀茱萸灣中不相值聞在幽居臥泉石思君夢君
何可得展畫空堂閱三昔

法界樓獨坐偶得四截句卽寄巨超僧湖州

危坐法界樓忽值北風迅一雁掠波來遙遙如問訊
巨公厓畔路會共巨公遊今日思巨公黃葉驚打頭
失足墮砌間我醉眠不醒丹楓欲埋人驚飈積成阱
巨公雖不見今見巨公徒欲上青山頂高瞻碧浪湖
顧文學寫青山紅樹圖贈方丈僧覺燈卽題其幘

春紅不如秋秋紅復輸冬嚴霜幾陣屋邊墮山果山葉
皆全紅渡頭人對山椒立十里青山裏紅葉斜陽一層
楓一層襯得此山紅百摺陡然落筆圖已成心花筆花
皆怒生顏色欲與霜花爭霜花豔壓山腰重半幅光凝
如蝶螻照醒蛟龍五更夢君不見君爲北苑僧南能詩
景寫就貽詩僧詩僧莫忽閒中景領取山前萬堆錦

題如鑑僧秋山宴坐圖遺照

池臺多半枕坡陀門外江光似鏡磨一片秋窗紅樹影
山僧無酒亦顏酡

放生池上憶前年話到空江落月邊病鶴與君回首早

放生池有病鶴與僧皆前後化去

祇餘憔悴一枯禪

時練塘僧亦久病

久坐山後望松寥二小山以水尙漲咫尺不得過

石梁徑可通松山寥山乃在波深處洪濤四面撼不停

欲共蒼鷹結巢住

野鷹皆集此山故俗又名鷹山

征鴻占麓鷹占峯共

欲立足波濤中蘆花隨雲白零亂新月出波竈上岸

于生淵問余在焦山載酒相訪留住數日醉中作詩送

之歸

昨宵一葉帆酒與生同到連晨酒欲完臨江送歸棹
題詩巖石間石爛詩亦朽惟餘影孤撐不隨東海走
我向茲菴住時時醉不醒夢中常到處天外一峯青

卜築嫌卑濕門低欲打潮

生所居第一
村地苦卑濕

何時時高閣同

上看金焦

自然菴僧瀛洲號能飲酒半忽大醉逸去作此

青山瘞鶴銘前路黃葉埋君醉後身我笑茅菴老居士
枉勞仙客伴清樽

將挂歸帆率賦一首

歸帆何止客心忙江亦回頭認故鄉却笑淮南五旬飲
抵他三萬六千場

偶得長句贈覺燈超凡兩方丈卽寄巨超卞山慧超攝
山兼示首座眞源知客僧若愚

借菴從學詩秋屏從學篆尤憐嬾殘僧殘夜鎮相伴嬾
殘之嬾誰可方佛火亦斷爐無香至今臥病古寮下粥

椀倩客調方嘗峴山詩僧絕孤冷前後同居攝山頂與慧

超前後主攝山方丈幽居泉石我不忘四面石峯如石井菲巖樓

閣雲煙間今與眞源並居正對黃鶴之南山就中一僧

雙鬢班棄儒學佛甘癡頑眞源本鳳陽諸生棄而學佛知客軒中澹

和尚詩筆居然亦相抗每聞清夜讀詩聲知客西軒接

方丈僧中數子並不凡筆與山石同雕鏤君不見山窗

莫謂閒無事讀罷新看奇字時巨超寄詩相質覺燈復代余作篆

初九夜與于生淵方丈僧覺燈坐寺門石闌上玩月并
望海門作

石闌干上影飄入隔江舟坐久月光濕觀空心鏡浮古
懷按斷碣世事問閒鷗不識滄溟外誰爲天盡頭

侵曉月波臺看日出

昨算一輪日今飛滄海東氣收遙夜黑光逼曙星紅世
外黃人捧天中赤道通誰言此臺小觀日泰山同

日觀
峯在

泰山
將歸復上山半看紅葉率賦

人衰先白髮樹老偏紅顏陰陽遞推遷少壯往不還造
物亦已勞曾少一日閒我來值仲冬草木亦盡刪雙峯

既隱隱三江亦潺潺感此數子心別易會甚難離觴且
暫停更一登北山留此一樹紅伴客雙鬢斑歸鴉倘前
知嘒嘒響禪關

題趙兵備翼秋山晚景長卷

疾雷激電破山出我自讀書君賦詩祇覺靜中皆有會
滿坡黃石點頭時

利名心並析秋豪珠玉叢中壇坫高十萬黃金詩一萬
送君歸老亦堪豪

卅年前苦較文忙垂老都成陸氏莊

費制使漕蔣漕督兆奎前後皆出公

門江左淮南諸節使歲除爭饋束脩羊

哦詩長日許隨肩一巷東西屋接連只我居貧最無賴

乞君千萬買鄰錢

趙兵備枉贈詩有虛名若論時長短縱不千年亦百年
二語爰廣其意戲簡一篇

長卽壽金石短或同蟪蛄若祇一百年何足論有無先生夙工長短篇若論律體尤精妍昔人所云銅頭鐵額五百漢究不若先生銅墻鐵壁五百間

先生自言七律
愜心者至五百

首珊瑚出海霞滿天精采下照千餘年昨來惠我詩一

紙大匠撝謙乃如此王楊盧駱等閒耳甘以浮名讓餘子我生孤露奚足言長亦世事相拘牽雄心已徂落日邊半共草木同酣眠雖然生氣存不與物並萎無論文體荒無論詩格卑我卽不好名名或欲我隨世間有盛

必有衰五百年內吾能知五百年外或者難支持

錢少詹大昕輓詩

相逢握手賀生還

余自塞外歸晤先生于吳門

昔昔眞如指一彈猶

記缺文商夏五

余左傳註成先生爲商推數事

最憐封札到秋殘

先生以冬

孟謝世秋杪

淮南薊北生徒盛王後盧前位置難

五十年來

爲樸學者王光祿鳴盛盧學士文弼而先生述作尤精審

十載頓亡三老學馮高不

覺涕洟瀾

詞源學術未分途獨力能將大雅扶北斗垂名到南斗
西都爲客問東都禮堂定後留其闕樂石按殘補所無
老不越疆吾自愧僅同徐禔獻生芻

十一月十四日爲莊徵君宇達補稱五十之觴徵君出

自壽詩見示率贈一篇

嗟余齒臘較君優君已初衰我轉憂屈指百年先過半
放裏圓月乍當頭猶耽仲蔚蓬蒿坐不作盧敖汗漫遊
好續南華舊時會君家先世有南華九老圖記繪君裙屐在西樓

趙兵備見示題湖海詩傳六截句奉酬一首

六百家詩六十年始于乾隆之元定知誰可繼前賢虛期識力

超今古却以科名派後先舊雨諒難忘沈趙沈尙書德潛爲王侍

郎詩派所自出趙兵部文哲又其患難友也故所選獨多邊風采不到黔滇靈光一

老仍無恙畢竟輸渠筆陣堅

十二月二日行城東

城東半畝宮瑟然有春意層檐障冰雪草綠尙無際窮

陰沍寒候初日出偏麗遂令衆生物別若一天地林間
雙喜鵲聲響亦交替我行願樂之稍休坐堦砌却藉壁
粉書嘉平月初二

石竹山房悼楊上舍槐

主人買石連雲根主人已亡石在門主人讌客羅古樽

古樽纔覆君斷魂徐家疊石亦如此

徐民部大榕亦最嗜奇石築小圃甫

就遠

石上松生人遽死烏乎石苦不能言一死一生皆

若此我爲弔客行石臺腹痛忍舉堂中杯君不見吾家
奇石出牆半未識還能幾回看

初八日侵曉詣天甯寺齋堂看食粥

一堂三百僧夜起然巨燭衆喙無一聲同焉食齋粥茅

檐散餘粒烏鵲欣可啄齋餘仍沃釜沾溉及羣族汝曹
無一事飯飽惟鼓腹豐年甯易覲况享太平福我居眞
咫尺早食亦粗足歸撥老瓦盆應欣芋魁熟

前題趙兵備行卷有十萬黃金詩一萬之句兵備復枉
詩相嘲爰戲答一篇

此閒歲暮偶苦貧奇想乃欲富以鄰適逢巨軸擲案上
白鬢紅頰此老何精神人思黃金鑄越臣不知臣家金
穴原等身牙籤玉軸中偶爾一欠伸下視黃鐵同黃塵
君家富術可傳世不積俸錢惟積貲

先生居官極廉黼
里後以授徒起家

廣陵絳帳設五年秦賈越商皆列侍經生此席本寒乞
從此入門饒利市場侯百物知低昂桓寬鹽鐵論亦詳

不貲富或由此始坐令儒術生輝光一金一幣用有方
任氏家法更爾能周詳君不見東鄰生亦粗成章賣文
諛慕何皇皇歲入僅可升斗量翻令此老笑口張甚或
如此茈茈囊又不見賣文無論錢有無究不若田文薛
縣日日收市租卽有諛墓文較及兩與銖總不若張說
橫財乃有三十鑪我言十萬信不虛質庫况爾盈吳趨
子錢及母錢疊日飛青蚨努力可望猗頓兼陶朱我言
如虛我受誣君亦莫更欺狂奴君不見狂奴逼歲氣更
粗買鄰十萬何不卽日輸不然欲向畫上此老日日追

前道

初抵吾與菴贈湛谷方丈

家鄰赤城寺移住支硎山東南名嶽多興到遞往還案
頭儒生書反比梵夾繁偶豈一義奇足警石性頑歲晏
客未歸伴此開士閒啟戶挹北風共鍊冰雪顏驚聞剝
啄聲長松響禪關

支硎山雜詩

探奇忽迷途時入歸鳥隊歸鳥向北飛夕陽紅在背餘
霞猶塞逕時復逗奇采我居青松裏三面窗染黛窗前
波一曲靜與山晤對甯惟鳥鉤駟亦覺魚瑣碎興倦北
壁眠濤聲靜堪愛

吾與
菴

山勢既百轉廊形亦千回人行螺旋中首頰不敢抬絕
壁下陡風鷹隼撲面來半時行空虛足底扉牖開濃香

滯遊蹤山腰逗黃梅頗訝衣袂斑時時綴青苔僧繇煮

山茶邀我坐石臺

法螺寺

茲山雲氣青石理偏黝黑雲門開一綫藤蔓倒垂赤虛
空樵徑斷鳥過亦如擲西行路稍展又見一峯坼松陰
思久憩石石起拒客潺湲分一道直下色如墨虛廊紅
粉剝陰翳成古色危坐百尺樓波光亦將夕

寒泉亭

山光飛不透高處一關鎖排空三兩石位置亦帖妥人
行飛鳥背面上落雲朶山腰岐路出恐與故人左時披
松竹翳引領復危坐不知斜陽東已復露星顛回途風
轉急吹落厓畔果酌此半月泉心空已忘我

暖翠閣

天平山

支礪石皆眠天平石皆立升中無寸壤石石作階級通天惟一綫退九進乃十晴陽煽中峯冰霜不能濕君看崖樹下驟暖已蘇蟄西行嶺逾陡星影綴圓笠督峯僅容足隼與客爭集莫枕巨石眠峯頽亦將及

石石悉破碎石石悉渾淪天風吹其間播盪及石根山巔黑磔柯積勢尙未崩後峯支前峯雲氣驟吐吞石頂百尺松隨風掃天門日月過亦愁排空劃刀痕盤盤西南山兀立太古墳鴻荒逮千年遺蛻久不存小憩一葉舟名茶香喜初溫

白雲泉

山頂挂一泉強判上中下泉聲飛落處曲折走巖罅山

僧掩泉竇古樹支一架閒房面深池坐久忘晝夜雲光
時欲斷嵐影仍激射游魚不知地惟以天作榭三更巖
月上星影向潭瀉枯僧雙白足久把塵事卸終當營危
巢倘與世人謝

無隱禪院

密林無冬春幽谷有昏旦嚴霜撼楓柏仍覺光景爛升
巔意初疲出險步方散精藍踞山腹巨石作鎌鏟僧閒
無伴侶雲影去來幻幽房閃虛聲山魃見曾慣回廊看
淪茗鑪冷復增炭頗驚苦寒月滿地落花瓣

時山茶
花甫落靜

對一曲池疎梅亦將綻

水木明瑟園展畢官保墓

白日何能燭九幽劇憐愛子亦從遊

時公次子高珠驟七

著書早

欲傳千載作宦空憐督八州吳苑水雲留別墅武昌風
月剩危樓年殘客到尤增感愁聽歸鴉噪隴頭

謁范文正公祠

曉日攜筇度石阡祠門開處謁前賢煙雲倏忽成今古
憂樂平生判後先邊吏尙呼窮塞主路人猶指義莊田
年來秦隴仍傳箭畢竟誰將國事肩

花山

一樓支松腰一寺陷石腹非關莓苔青太古已斑剝人
煙蒼翠裏雲亦染深綠林深樵斧歇時亦響啄木三峯
盪遙紫一澗瀉寒玉峯奇非意想驟覺訝心目猶疑龍

母宅散把兩工收終當呼方平一叱起衆伏

中峯

到來三重岡圓月出圓嶺回瞻花山寺尙復挂夕景殘
紅門虛白空際無定影獅山插天半霞采黃百頃連峯
驚五色照耀入塔頂窮觀因久憩已復啜苦茗山居苦
寒宋清響出房冷歸路約半程星光滿墟井

十五日偕陳徵君鱣鈕布衣樹玉暨澄谷方丈重遊白
雲抵暮乃返

纔遊山寺歸忽喜故人至故人清興發仍與詣山寺樵

童攜一兩石屋歷三四同遊今六載

己未春與布衣
同探梅元墓

蠟

屐喜重試酌泉心乍定陟嶺步初肆歲晏冰雪中所欣

無一事閑從麋鹿隊，默會巢許志。茅茨留古夢，松竹浣
塵思。誠知人境遠，不覺客蹤滯。歸路月已高，村醪亦須
市。

是日晚澄谷方丈，招同陳徵君、鈕布衣及黃主政、丕烈。

見山閣小集分韻得把字。

是夕月食
更餘始復

更敲一點遲，月食二分寡。須臾光復滿，樓上酒堪把。故
人皆非常，下筆嬾羣雅。不來時入夢，來卽我心寫。高談
鬥檐鈴，逸響扼樓瓦。詞華挹雄向，學樸研鄭賈。寓慨觚
不觚，精言馬非馬。奇香熏鵲腦，俊味得龍鮓。風稜削須
眉，雲朶濕衫袴。談深甯忍別，欲去留復且。送客過石橋，
輝輝月盈野。

偕湛谷至鄧尉看梅

探梅何太早，梅蕊未杼紅。領取高寒意，須從冰雪中。素心惟白石，行足共支公。誰識勞勞客，年前事鑿空。

十六日早泊舟米堆山至元墓探梅道中作

三更一棹出溪灣，烏鵲隨人往復還。心祝水鄉年事好，落帆先泊米堆山。

探奇尋徧萬株梅，小憩危亭午夢回。正欲烹茶無處所，亂峯堆裏爨煙開。

還元閣

平田望山椒，朱甍亘天半。入門階級迥，石壁插霄漢。陽山何窈窕，正面作几案。鏡裏怖鴿飛，雲中估帆亂。枯僧

導前路延客憩別館化人留精廬高士擘古篆

邇元閣
爲徐高

士坊
所書

軒櫺饒別趣爐鼎寡近玩捫碑心已肅酌水手仍

盥危潭俯不測峻坂陟無算却出松柏林古梅熏鼻觀

香雪海

己未春首曾探梅于此是歲八月卽
蒙恩遣戍伊犁迄今已六年矣

驚濤三萬里噩夢四五年逐客須鬢蒼梅枝亦高騫我
居西海頭時時夢山巔振翮不得飛誓老絕域邊何期
復生還重履山下田對花客憮然花亦笑口媯當時手
植枝倏忽已及肩尙斂萬樹香交此四野煙山色冷未
蘇水腹凍已堅小臥峯頂雲驚魂怯遙天

光福鎮

一湖三萬頃環以七十峯一塔勢盡收不覺增級崇漁

艇百尺帆竭力使北風靜觀歷逾時不越坳堂中直下
千百層隱隱聞洶洶湖寬出饒蛟山中蟄雨龍陽山爲龍所窟
所喜人事恬墟井尙鬱葱家家祀竈忙村村爨煙濃干
門有神茶四野無哀鴻我願樂不支加餐向船篷

驚魚澗

人境旣已遠樓與竹木平疎梅甫著花枇杷葉仍青空
外水四周缺處嵌一亭不知深山中魚鳥何尙驚雲泉
乃其天足以悅性靈半晌頰首觀時喜出藻萍我亦縱
壑鱗曾經泛滄溟當其勢倉皇魴鯉爲失聲倘非大造
恩安得返故扁魚樂我不知魚驚我怵怵目極東逝波
涓涓傷我情

題吾與菴圖

吾與菴中路松篁峭不羣畫中曾住我世外忽逢君初

地無餘劫浮天有斷雲因遲願居士展卷把香熏

願上

舍鶴慶所作

藕花菴

小築松深處池臺割澗成礙眉雙樹秀劈面一峯傾心

靜花旛影神驚斧鑿聲

菴正面金山土人鑿石不絕

累他雙燕子故

墨幾回更

普賢禪院

一道水流急尋源欵石屏山茶紅礙帽野竹綠侵衣飯

芋僧仍瘦餐松鼠亦肥未妨爐火斷歲晚客來稀

歲暮雜詩

我居吾與菴冬月亦已殘時攜古人書向此窗隙攤古
人欲立勲亦恐無我聞東風來何遲西日去不還願以
一寸心徑比木石頭

飲石欲鍊骨餐冰欲明心我有太古懷冉再生自今長
松峙我前高下及百尋松聲灑然來亦足挹素襟頗感
風日佳因之亦長吟

我感叔豹言世祿非不朽立德與立言於我究何有置
身邱與壑矢志頗不苟身退尙著書聊思慰吾友不知
千載下可更識誰某百事渺一成頽然遽成叟

三椽築茅廬頰仰可無癘妻孥盈我前知我意何在妻

孛猶不識何況友朋隊卑躬抱微尚沒世寡後悔高瞻
逮皇古下視及于載知我卽有人先愁不能待

世事百不識我頗輕腐儒語錄盈我前眼倦不欲舒道
在六籍中勘實不履虛何因襲元言願以聖自居謬種
日以多修途日以紆一世笑我狂我亦笑子愚

我家居毗陵百載亦云久憶從祖考來成法可世守一
衣兼一食垂訓皆不苟童年感孤露聖善有吾母誨我
勤載籍誨我覓升斗中道忽棄捐遺言猶在口築室先
壠旁他時正邱首

箏簫笙笛琴佐以胡琵琶堂中聞妙香堂下羅名花我
謀一日歡費足資十家餽飢亦有人獨樂良所嗟不見

梓澤園池臺久欹斜白首同所歸安能事驕奢

憶從伊江歸身世感再造荷此天地恩捐軀亦難報身
雖無所用事必求厥要屏除塵與翳不使及堂奧庶幾
能辛勤藉以展微效

一巷數百家生計皆苦艱操作春逮冬歲晚未得閒妻
孥亦同心勤力井日間百病總不生天慙醫藥難狐裘
一何溫鶉衣一何單

生居城市中所苦不識耕亦有菜一畦荷鋤學編氓衣
食纔取足不欲求其贏此多彼卽寡物理苦不平啼飢
滿門前積粟亦敢爭我有藥石言願以貽後生

無衣必求衣無食必求食八口我所私何敢累親識儒

生讀書外貴在勤已力縱無梁與肉粗可啖糠覈家政
亦有經當窗婦能織

我生秉庭訓不作無用言虛抱拯世心經訓藉可箋鑿
楹貯羣書卽是儒者田書外一物無茅亭及茨軒著書
暇日多餘力吟一篇

木實可作食木葉可作衣乳鴉巢其間不識凍與飢甯
知歲臘殘人事日已非何處覓斗升老幼日夜啼司命
苦乏供清水汲石磯衣麻常苦單食粥常苦稀

千村爆竹聲樂歲實堪慶人欣年齒增羊豕命偏併搜
山及麋鹿隨雲設陷穿人縱重厥生何爲輕物命珍羞
信堪飫鼎俎亦易罄我讀黃帝書惟應食梟獍

吳趨俗尚華所重在元日冠裘並新製鬢髮亦梳刷行
逢衣淡素羣語豈不吉我多方外友衫苦百垂結云服
壞色衣方能見菩薩

支硎及鄧尉十日屐齒餘雖看萬樹樛惜少六出花心
切三田中二麥初萌芽嚴冬地無毛惟藉雪霰遮願祝
東北風掃此天半霞夜聞折竹聲飛花滿千家

德雲精舍

老僧閒臥處枕上水無邊雀占屏爲屋魚窺鏡作天草

青殘臘日髮白

上皇年

菴僧年八十曾主鄧尉
方丈獲觀

純皇

帝三面峯嵐好都朝錫杖前

石像菴

偶訪石居士閒同鐵脚僧畫昏樵北苑衲古似南能客

醉包山果

時以楊梅酒餉客

茶燒塔院燈勤公遺舄在

勤一僧始開山

傳已到雲初

留別澄谷方丈

君爲退院僧我亦罷閒吏從容雲水間遂爾成默契天
平鄧尉兼支硎介紹兩客交忘形別山夢山山轉青更
夢老衲松風扇

過錫山訪張太守鳳枝

南荒窮太守何日返西荒萬里纔歸骨三旬屢斷腸

君入

關後始知愛妾難經尋長君亦物故

疲蹤滯揚越變調激伊涼投篋衣裘

盡空餘古錦囊

小除日招同吳封君端彝趙司馬懷玉暨小阮秀才學
彭莊明經穎曾暨小阮徵君宇遶段達和陸繼輅兩
孝廉及兒子節孫更生齋早集仿賈長江例祭詩卽
席用徵君原韻

小雨連晨路不乾年除聊復強爲歡要從寒瘦求郊島
敢說文章比杜韓阿凍未妨傾卯酒祭詩先已借辛盤
他時西海留壇坫余自塞外回署一齋名西海合與長江一例看

哭楊布政揆

八年憔悴歷行間殉國仍憐鬢未斑直北路皆籌筆驛

君自西川及甘陝軍營無不涉歷

大西天作勒銘山

會隨大學士福康安至西藏

愁

看烽燧眉常歛病伏弓張血尙殷誰料玉關分手處君

成死別我生還

曾孫用懃校刊